

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

Poštovana braćo i sestre, draga djeco i omladino, esselamu alejkum!

Mi živimo u svijetu, pomoću kojeg i na svaki način, prokleti šejtan želi da iz našeg života i govora izbriše spominjanje Jednog Jedinog Boga – Uzvišenog Allaha. Ako malo obratimo pažnju, vidjet ćemo da mu to polazi za rukom i da su naše svakodnevne najfrekventnije riječi poput sljedećih: stres, rad, umor, plata, kredit, stan, kuća, dug, kamata, kriza, besparica, i slične.

Radi toga, u današnjoj hutbi, želim da nas podsjetim na važnost jedne rečenice od koje ovisi sav naš rad i uspjeh, i od koje ovise sva naša dobra djela, a to je **Bismilla**.

Govoreći o Bismilli, Poslanik, s.a.v.s., je rekao: **„Kada bi sva stabla na zemlji bila pera, a mora tinta, pa kada bi se sva ta pera umakala u tintu i pisala značenje Bismille, prije bi se tinta istrošila nego što bi se zapisalo značenje**

Bismille, pa čak i kad bi je pisali i meleki i džinni, bili bi nemoćni ispisati značenje ovog ajeta.“

Prema tome, u današnjoj hutbi ukratko ćemo govoriti o Bismilli, odnosno, samo ćemo malo zahvatiti iz nepreglednog oceana njene mudrosti. Navodi se da je Džibrila, a.s., dok je nosio Bismillu kada ju je Uzvišeni Allah prvi put objavio, pratilo tisuću meleka iz počasti prema njoj i njenoj veličini. Kada je Bismilla bila napisana, iz počasti prema njoj svi džini pali na sedždu Allahu, dž.š..

Bismilla se nalazi na početku svake sure u Kur'anu, osim sure Et-Tevba, jer se u njoj govori o ratovanju, a u ratu nema milosti. S druge strane, u suri En-Neml Bismilla je spomenuta dva puta, tako da se u Kur'anu Bismilla spominje ukupno 114 puta.

Bismilla ima pet riječi i u prijevodu znači: **„U ime Allaha, Milostivog, Samilosnog.“** To su riječi, koje svi učimo već prvog dana u mektebu i koje izgovaramo prije svakog dobrog i korisnog djela. Tim riječima mi poručujemo: „Ovo djelo ja počinjem sa sjećanjem na Allaha, Koji je

Milostiv prema svim Svojim robovima, i dobrim i lošim, i Koji će biti Samilostan prema vjernicima na Sudnjem danu.“

Bismilla sadrži 19 harfova, a toliko ima i čuvara Džehennema (zebanija), pa onaj tko bude stalno učio Bismillu u svim prilikama, Allah će ga sačuvati od zebanija. I uvijek kad izgovori Bismillu, džennetski poslužitelji govore: **„Ja Rabbi, ovaj tvoj rob uči Bismillahir-rahmanir-rahim, pa ga sačuvaj od vatre i uvedi ga u Džennet.“**

Kada je na Israu i Mi'radžu Poslaniku, s.a.v.s., pokazan Džennet, vidio je četiri rijeke. Prva je bila od bistre vode, druga od mlijeka, treća od vina, a četvrta od meda. Poslanik, s.a.v.s., je upitao Džibrila, a.s., odakle izvire te rijeke, a on mu je odgovorio da zna da one uviru u vrelo Kevser, a da ne zna odakle izvire i da to pitanje može uputiti svome Gospodaru.

Allah, dž.š., je tada poslao meleka koji je rekao Poslaniku, s.a.v.s., da zatvori oči. Nakon što ih je ponovo otvorio, Poslanik, s.a.v.s., se našao ispred jednog stabla na kome je bila kupola od bijelog bisera, vrata od zelenog jakuta (rubin,

safir), a brava od crvenog zlata. Kupola je toliko velika da kada bi se svi džinni i ljudi sakupili na njoj, bili bi kao jedna ptica na vrhu nekog brda. Melek ga upita zašto ne uđe u kupolu, a Poslanik, s.a.v.s., mu odgovori da nema ključa. Melek mu tada reče da je ključ kod njega, a to je Bismilla. Nakon što je Poslanik, s.a.v.s., proučio Bismillu, vrata su se otvorila i kada je ušao, vidio je da one četiri rijeke izvire sa četiri strane kupole. Preko cijele kupole je napisana Bismilla. Prva rijeka izvire iz harfa „mim“ iz riječi „Bismillah“, druga iz harfa „ha“ iz iste riječi. Treća rijeka izvire iz harfa „mim“ iz riječi „Rahman“, a četvrta iz harfa „mim“ iz riječi „Rahim“. Tada mu je Allah Uzvišeni rekao: „**O Muhammede, tko god Me se od tvoga ummeta sjeti i spomene ovim imenima, napit će se sa ovih rijeka.**“

Pored ahiretskih blagodati Bismilla nudi i i dunjalučke, a to su **bereket i sigurnost**. U hadisima se navodi da ona štiti čovjeka od nesreća i belaja. Tako, u jednom hadisu Poslanik, s.a.v.s., je rekao da: „**kada čovjek uđe u kuću bez Bismille, onda šejtan poviče drugim**

šejtanima: „Hodite, našli smo sebi prenočište.“ A kada još čovjek počne jesti hranu bez Bismille, onda šejtan kaže ostalima: „Hodite, evo imamo i večeru.“

Također je Poslanik, s.a.v.s., rekao da: „**kada čovjek prije spolnog odnosa ne izgovori Bismillu, onda i šejtan učestvuje u tom odnosu.**“

Braćo i sestre! Blagodati Bismille su neizbrojive. Danas smo čuli tek samo maleni broj njih. Ali i one su više nego dovoljne da više cijenimo Bismillu i ono što ona predstavlja u našim životima. Nakon svega navedenog pozivam sebe i vas - učimo što češće Bismillu i udaljimo šejtana od sebe, od svoje porodice i od svoje imovine. Isto tako, trudimo se da i naše porodice što češće izgovaraju ove mubarek riječi. Učimo im je naglas, sve dok sami ne počnu da je uče.

Molim Dragog Allaha da nas uputi na Pravi put, da što češće učimo Bismillu i da nam podari sve njene blagodati na dunjaluku i na Ahiretu!

Amin!

Split, 18.03.2016. Pripremio: Vahid ef. Hadžić
na temelju pisanja hfz. Midhat ef. Sejfića
Prethodne hutbe potražite na našoj stranici:

www.medzlis-split.org

ISLAMSKA ZAJEDNICA U HRVATSKOJ
MEDŽLIS ISLAMSKJE ZAJEDNICE SPLIT

بِسْمِ اللَّهِ الرَّحْمَنِ الرَّحِيمِ

UČIMO
BISMILLU

432

Amin!